

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E
o nepostojanju zloupotrebe dominantnog položaja
privrednih subjekata „Radio - televizija Bosne i Hercegovine“, „Radio - televizija Republike
Srpske“, i „Radio - televizija Federacije Bosne i Hercegovine“,

Sarajevo
mart, 2014. godine



Broj: 01-26-3-08-148-II/13
Sarajevo, 6. 3. 2014. godine

Na osnovu člana 25. stav (1) , člana 42. stav (2) i člana 11. stav (3), u skladu s članom 11. stav (2) Zakona o konkurenciji («Službeni glasnik BiH», br. 48/05, 76/07 i 80/09) i članom 105. Zakona o upravnom postupku («Službeni glasnik BiH», br. 29/02, 12/04 88/07, 93/09 i 41/13), rješavajući po posebnom zahtjevu za donošenje rješenja privrednih subjekata „Radio - televizije Bosne i Hercegovine“, Bulevar Meše Selimovića 12, 71 000 Sarajevo, „Radio - televizije Republike Srpske“, Trg Republike Srpske 9, 78 000 Banja Luka i „Radio - televizije Federacije Bosne i Hercegovine“, Bulevar Meše Selimovića 12, 71 000 Sarajevo, svi zastupani po zajedničkim punomoćnicima, Kerimu Karabdiću i Džemilu Sabrihafizoviću, advokatima iz Sarajeva, broj: 01-26-3-08-144-II/13 od 20.1.2014. godine, i posebnom zahtjevu privrednog subjekta “OBN” d.d. Sarajevo, Humska 1, 71 000 Sarajevo, zastupanog putem punomoćnika, advokatske kancelarije Gavrankapetanović-Koldžo-Kukić-Gavrankapetanović, broj: 01-26-3-08-144-II/13 od 6.2.2014, Konkurencijsko vijeće je na 83. (osamdesettrećoj) sjednici održanoj dana 6. marta 2014. godine, donijelo

R J E Š E N J E

1. Smatra se da privredni subjekti „Radio - televizija Bosne i Hercegovine“, Bulevar Meše Selimovića 12, 71 000 Sarajevo, „Radio - televizija Republike Srpske“, Trg Republike Srpske 9, 78 000 Banja Luka i „Radio - televizija Federacije Bosne i Hercegovine“, Bulevar Meše Selimovića 12, 71 000 Sarajevo, u skladu sa članom 11. stav (2) Zakona o konkurenciji, ne zloupotrebljavaju dominantan položaj u smislu člana 10. stav (2) tačke a), c) i d) istog Zakona.
2. Svaka strana snosi svoje troškove postupka.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 29.4.2013. godine, zaprimilo Zahtjev za pokretanje postupka, broj: 01-26-3-08-II/13 (u daljem tekstu: Zahtjev) privrednog subjekta “OBN” d.d. Sarajevo, Humska 1, 71 000 Sarajevo (u daljem tekstu: “OBN” ili Podnosilac zahtjeva), putem advokatske kancelarije Gavrankapetanović-Koldžo-Kukić-Gavrankapetanović, protiv privrednih subjekata „Radio - televizije Bosne i Hercegovine“, Bulevar Meše Selimovića 12, 71 000 Sarajevo (u daljem tekstu: “BHRT”), „Radio - televizije Republike Srpske“, Trg Republike Srpske 9, 78 000 Banja Luka (u daljem tekstu: “RTRS”) i „Radio - televizije Federacije Bosne i Hercegovine“, Bulevar Meše Selimovića 12, 71 000 Sarajevo (u daljem tekstu: “FTV”), radi utvrđivanja postojanja zloupotrebe dominantnog položaja, u smislu člana 10. stav 2) tačke a), c) i d) Zakona o konkurenciji (u daljem tekstu: Zakon).

Na osnovu dostavljene dokumentacije, Konkurencijsko vijeće je ocijenilo da nije moguće bez provedenog postupka utvrditi postojanje povrede Zakona na koje Podnosilac zahtjeva ukazuje, te je u smislu člana 32. stava (2) Zakona, donijelo Zaključak o pokretanju postupka, broj: 01-26-3-08-6-II/13 dana

11.6.2013.godine, radi utvrđivanja zabranjenog konkurencijskog djelovanja, u smislu člana 4. stav (1) tačke a), c), d) i e) i i zloupotrebe dominantnog položaja u smislu člana 10. stav (2) tačke a), c) i d) Zakona.

U skladu sa članom 33. Zakona, Konkurencijsko vijeće je Zahtjev i Zaključak dostavilo na odgovor privrednim subjektima: "BHRT" dana 11.6.2013. godine aktom broj: 01-26-3-08-11-II/13, "RTRS" dana 12.6.2013. godine aktom broj: 01-26-3-08-12-II/13 i "FTV" dana 12.6.2013. godine aktom broj: 01-26-3-08-13-II/13.

S obzirom da se radi o postupku sa strankama sa suprotnim interesima, u svrhu prikupljanja novih dokaza i pružanja mogućnosti strankama da se izjasne o činjenicama i okolnostima, koje su od važnosti za donošenje konačnog rješenja, Konkurencijsko vijeće je, u skladu sa članom 39. Zakona, zakazalo usmenu raspravu za dan 30.9.2013. godine. (poziv dostavljen punomoćniku "OBN"-a aktom broj: 01-26-3-08-72-II/13 i punomoćnicima "BHRT", "RTRS" i "FTV" aktom broj: 01-26-3-08-73-II/13, dana 3.9.2013. godine).

Tokom postupka a radi utvrđivanja svih relevantnih činjenica, u smislu odredbi člana 35. stav(1) tačke a) i c) Zakona, Konkurencijsko vijeće je prikupljalo podatke i dokumentaciju i od drugih tijela/institucija koje nisu stranke u postupku.

Nakon prikupljanja svih relevantnih činjenica, i utvrđivanja činjeničnog stanja, odnosno nakon provedenog postupka po zahtjevu privrednog subjekta OBN radi utvrđivanja postojanja zloupotrebe dominantnog položaja iz člana 10. stav (2) tačke a), c) i d) Zakona, kao i donošenja rješenja o privremenoj mjeri, u smislu člana 40. Zakona, Konkurencijsko vijeće je na 77. sjednici održanoj dana 27.12.2013. godine razmatralo Prijedlog konačnog rješenja.

Prilikom razmatranja i glasanja po Prijedlogu rješenja nisu postignuti uslovi predviđeni članom 24. stav (2) Zakona o konkurenciji, koji propisuje da se odluke Konkurencijskog vijeća donose većinom glasova prisutnih članova s tim da za svaku odluku mora glasati najmanje po jedan član iz reda konstitutivnih naroda. Naime, četiri člana Konkurencijskog vijeća su glasali za prijedlog rješenja dok su dva člana bila protiv. Iz navedenog proizilazi da Konkurencijsko vijeće nije donijelo konačnu odluku, pa su se s tim u vezi stekli uslovi za donošenje rješenja u skladu sa članom 11. stav (3) Zakona, ukoliko stranke podnesu zahtjev za isto.

Članom 41. stav (1) tačka c) Zakona je propisano da je nakon donošenja zaključka o pokretanju postupka Konkurencijsko vijeće dužno donijeti konačno rješenje o utvrđivanju zloupotrebe dominantnog položaja u roku od 4 mjeseca.

Članom 11. stav (2) Zakona propisano je da ukoliko Konkurencijsko vijeće ne donese rješenje u roku iz člana 41. stav (1) tačka c), smatra se da se zaključenim sporazumom odnosno postupanjem privrednog subjekta ne zloupotrebljava dominantan položaj. Na poseban zahtjev privrednog subjekta, Konkurencijsko vijeće u skladu sa članom 11. stav (3) Zakona donosi rješenje da zaključenim sporazumom, odnosno postupanjem privredni subjekt ne zloupotrebljava dominantan položaj.

Konkurencijsko vijeće iz naprijed navedenih razloga nije donijelo konačno rješenje u zakonskom roku iz člana 41. stav (1) tačka c) Zakona.

Privredni subjekti BHRT, RTRS i FTV su podnijeli Konkurencijskom vijeću poseban Zahtjev za donošenje rješenja u smislu člana 11. stav (3) Zakona dana 20.1.2014, broj: 01-26-3-08-144-II/13, kojem su istovremeno tražili i odlučivanje o troškovima postupka a isti Zahtjev je podnio i privredni subjekt OBN dana 6.2.2014, broj: 01-26-3-08-144-II/13.

Postupajući po Zahtjevu za donošenje rješenja Podnosioca zahtjeva, a imajući u vidu naprijed navedeno, Konkurencijsko vijeće je konstatovalo da je rok za donošenje konačnog rješenja u smislu člana 41. stav (1) tačka c) Zakona protekao, te je u skladu sa članom 11. stav (3) Zakona donijelo odluku kao u tački 1. dispozitiva ovog Rješenja.

Troškovi postupka

U skladu sa odredbom člana 105. Zakona o upravnom postupku punomoćnik privrednog subjekta "OBN" je dostavio zahtjev za nadoknadu troškova postupka u ukupnom iznosu od 3.685,50 KM, podneskom broj: 01-26-3-08-80-II/13 dana 30.9.2013. godine, a punomoćnik privrednih subjekata "BHRT", "RTRS" i "FTV", podneskom broj: 01-26-3-08-79-II/13, od dana 30.9.2013. godine zahtjev za naknadu troškova postupka u ukupnom iznosu od 561,60 KM.

Konkurencijsko vijeće je prilikom odlučivanja o troškovima postupka uzelo u obzir odredbe Zakona o upravnom postupku („Službeni glasnik BiH“, br. 29/02, 12/04, 88/07 i 93/09), i to član 105. stav (1) Zakona o upravnom postupku koji propisuje da, po pravilu, svaka stranka snosi svoje troškove postupka, kao i odredbe člana 105. stav (3) istog zakona prema kojem se troškovi za pravno zastupanje nadoknađuju samo u slučajevima kad je takvo zastupanje bilo nužno i opravdano.

Kako Konkurencijsko vijeće nije donijelo meritornu odluku u konkretnom slučaju, tako nije moglo ni primjeniti odredbe člana 105. stav (2) Zakona o upravnom postupku, te je na osnovu navedenog odlučilo kao u tački 2. dispozitiva ovoga Rješenja.

Na osnovu gore navedenog Konkurencijsko vijeće je odlučilo kao u tački 2. dispozitiva ovoga Rješenja.

Administrativna taksa

U skladu s članom 2. tarifni broj 107. stav (1) tačka g) Odluke o visini administrativnih taksi u vezi sa procesnim radnjama pred Konkurencijskim vijećem («Službeni glasnik BiH», broj 30/06 i 18/11) Podnosilac zahtjeva je na ovo Rješenje obavezan platiti administrativnu taksu u iznosu od 1.500,00 KM u korist Budžeta institucija Bosne i Hercegovine, a kako su obje stranke podnijele zahtjev, u skladu sa članom 4. stav (2) Zakona o administrativnim taksama ("Službeni glasnik BiH", broj 16/02, 19/02, 43/04, 8/06, 76/06 i 76/07), taksena obaveza iznosi po 750,00 KM za svaku stranku.

Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Gordan Raspudić